

16 JUL 2001

Jamuan-Rekod

JAMUAN BERSAMA PM KINI DALAM MALAYSIA BOOK OF RECORDS

MELAKA, 16 Julai (Bernama) -- Jamuan Makan Malam Rakyat Bersama Perdana Menteri Datuk Seri Dr Mahathir Mohamad di Dataran Sejarah, Air Keroh malam ini dicatatkan sebagai majlis makan malam terbesar di Malaysia.

Perdana Menteri ketika berucap di majlis itu berkata jamuan sebesar ini yang berlangsung begitu aman dan tidak diganggu oleh keadaan yang tidak tenteram menunjukkan perpaduan dan keharmonian kaum di negara ini.

Jamuan itu kini tercatat dalam Malaysia Book of Records sebagai majlis jamuan yang dihadiri oleh paling ramai orang di negara ini.

Pengarah Urusan Malaysia Book of Records Danny Ooi menyampaikan sijil pengiktirafan bagi pencapaian bersejarah itu kepada Dr Mahathir untuk diserahkan kepada Ketua Menteri Melaka Datuk Wira Mohd Ali Rustam.

Dianggarkan lebih 25,000 orang menghadiri jamuan itu dan memecahkan rekod yang dibuat oleh Negeri Sembilan sebelum ini dengan kehadiran seramai 20,200 orang.

Jamuan itu diserikan dengan persembahan kebudayaan daripada pelbagai kaum di negeri itu termasuk masyarakat orang Asli dan pertunjukan bunga api.

Ia turut diserikan dengan bacaan puisi bertajuk "Percakapan Puisi Untuk Mahathir" dicipta dan disampaikan oleh Noor S.N sendiri.

Sebanyak 2,500 buah meja dengan 10 orang setiap meja disediakan penganjur dan 17 orang mengetuai kerja-kerja menyediakan masakan untuk jamuan itu.

Antara makanan yang dihidangkan ialah nasi beriyani dan asam pedas.

Selain itu, seramai 500 petugas bertugas untuk memastikan kelancaran jamuan berkenaan termasuk menjaga tempat letak kereta.

Jamuan itu dihadiri oleh pelbagai lapisan masyarakat termasuk anggota-anggota pertubuhan bukan kerajaan (NGO), kakitangan kerajaan, pertubuhan sukarela, pemimpin parti politik dan pemimpin masyarakat.

-- BERNAMA

APG SBS NO PR